

NEWSPAPER CLIPPING  
PERDANA LEADERSHIP FOUNDATION

UTUSAN MALAYSIA

DATE: 30/6/2008

## MEMPERSOALKAN KONTRAK SOSIAL SELEPAS 50 TAHUN

RAMAI yang tertanya-tanya apa motif Majlis Peguam menganjurkan Forum Kontrak Sosial bagi membincangkan ketuanan dan hak keistimewaan orang Melayu.

Lagi pula apakah hak ahli-ahli panel seperti Dr. Mavis Puthuchearry; Dr. Kua Kia Soong dan Tommy Thomas untuk membincangkan isu-isu berkaitan orang Melayu?

Sebab itu, ia dilihat sebagai cubaan pihak tertentu untuk mengambil kesempatan daripada situasi politik ketika ini untuk melahirkan rasa kurang senang terhadap orang Melayu yang merupakan kaum majoriti di negara ini.

Pihak penganjur mendakwa perbincangan pada forum itu dilakukan secara profesional dan rasional. Namun ia tidak dapat lari daripada timbulnya rasa tidak puas hati yang boleh membawa kepada salah faham dan akhirnya menjerumus kepada perkauman.

Bayangkan apa akan jadi apabila orang Melayu berkumpul dan berbincang untuk menentukan hak-hak orang bukan Melayu tanpa ada wakil mereka di dalamnya? Tentu pelbagai pihak akan

tampil memprotes, mengugut dan mendesak supaya dilakukan itu ini.

Sebagai orang Melayu pula apa akan mereka rasa apabila melihat dan mendengar pakar-pakar sosial bukan Melayu duduk di atas pentas bercakap soal hak mereka? Tentu ada akan merasa tercabar.

Selepas forum itu berakhir, apakah manfaatnya kepada orang Melayu dan hubungan antara kaum di negara ini? Adakah semakin kukuh atau sekadar menambahkan lagi kebencian dan kemarahan.

Bagi ahli-ahli panel bukan Melayu itu pula, ketika membuat penyelidikan dan kajian sedikit sebanyak tentu ada perasaan bias kalaupun tidak benci.

Kenapa hanya soal hak istimewa dan ketuanan Melayu sahaja dibincangkan? Kenapa soal pencapaian orang Melayu sejak negara mencapai kemerdekaan 50 tahun lalu tidak dibincangkan sama?

Walaupun hak keistimewaan orang Melayu tercatat dalam Perlembagaan namun orang Melayu tidaklah istimewa.

Selain memegang kuasa dalam politik, orang

Melayu serba ketinggalan dalam bidang lain.

Kalau orang Melayu benar-benar istimewa dan diberikan segala keistimewaan oleh kerajaan kenapa mereka hanya menguasai 18 peratus sahaja ekonomi negara. Angka itu belum lagi ditolak ekuiti yang dimiliki syarikat milik kerajaan (GLC).

Malah tengoklah dalam Majlis Peguam itu sendiri. Berapa kerat peguam Melayu yang ada dan kaum mana yang lebih ramai jadi peguam? Malah disebabkan tidak ada yang istimewa di kalangan orang Melayu maka Majlis Peguam terpaksa mengambil panel bukan Melayu untuk membincangkan isu Melayu.

Sebab itu, apabila sesuatu pertubuhan sama ada sosial ataupun politik mahu bercakap atau membincangkan hal orang Melayu, ia perlu dilihat secara menyeluruh. Bukan melihat kepada isu-isu yang terpilih dan kemudiannya digembar-gemburkan seolah-olah kaum lain ditindas oleh pemimpin-pemimpin politik Melayu. Sedangkan hakikatnya orang Melayu dengan segala keistimewaan dan ketuanannya itulah yang paling tertinggal dan terpinggir di negara ini.